



REPUBLIKA E SHQIPËRISË
AUTORITETI I KONKURENCËS
KOMISIONI KONKURENCËS

Nr. 182 / prot. 6

Tiranë, më 07.04.2023

VENDIM

Nr. 912 Datë 07.04.2023

“MBI AUTORIZIMIN E PËRQENDRIMIT TË REALIZUAR NËPËRMJET PËRFTIMIT TË KONTROLLIT TË NJËSISË SË BIZNESIT “MOBILITY SERVICE PLATFORM” NGA SHOQËRIA CARIAD SE”

Komisioni i Konkurrencës me pjesëmarrjen e:

Z.	Denar BIBA	Kryetar
Znj.	Leida MATJA	Zv/Kryetar
Znj.	Adriana BERBERI	Anëtar
Znj.	Rezana KONOMI	Anëtar

Në mbledhjen e tij të datës 07.04.2023, shqyrtoi çështjen me:

Objekti:

Autorizimi i përqendrimit të realizuar nëpërmjet përfutimit të kontrollit të Njesisë së Biznesit “Mobility Service Platform” nga shoqëria CARIAD SE.

Baza Ligjore:

Nenet 2, 10-12, neni 24, germa d, dhe nenet 53-64 të ligjit nr. 9121, datë 28.07.2003 “Për mbrojtjen e konkurrencës”; Rregullorja “Për zbatimin e procedurave të përqendrimit të ndërmarrjeve”; Udhëzimi “Për formën e njoftimit të përqendrimit” dhe Formulari i njoftimit të përqendrimit.

Komisioni i Konkurrencës, pas shqyrtimit të relacionit të Sekretarit të Përgjithshëm si dhe raportit të Drejtorisë së Analizës dhe Metodologjisë së Tregjeve mbi njoftimin e përqendrimit të realizuar nëpërmjet përfutimit të kontrollit të Njesisë së Biznesit “Mobility Service Platform” nga shoqëria CARIAD SE.

VËREN SE :

I. Palët në transaksion dhe procedura

Pranë Autoritetit të Konkurrencës është njoftuar transaksioni në lidhje me përfutimin e kontrollit të Njesisë së Biznesit “Mobility Service Platform” nga shoqëria CARIAD SE.

Referuar dokumentit “Kontratë Blerje për Njesisë e Biznesit “Mobility Service Platform”, të nënshkruar më datë 27 janar 2023, palët në marrëveshje janë:

Pala blerëse: CARIAD SE është një shoqëri evropiane, e themeluar në përputhje me legjislacionin gjerman, me objekt aktiviteti: zhvillimin dhe shitjen e zgjidhjeve softuerike për industrinë automobilistike dhe pjesëmarrjen në shoqëri të të gjitha llojeve, veçanërisht në industrinë e softuerit. CARIAD SE është një filial i zotëruar plotësisht nga shoqëria Volkswagen Aktiengesellschaft.

Volkswagen Aktiengesellschaft është një shoqëri aksionare, e themeluar sipas legjislacionit të Gjermanisë, me objekt veprimtarie: prodhimi dhe shitja e automjeteve dhe motorëve të të gjitha llojeve, pjesëve të tyre si dhe të gjitha sistemeve, makinerive, veglave dhe produkteve të tjera teknike, shoqëria mëmë e Volkswagen Group.

Grupi Volkswagen është aktiv në të gjithë botën në zhvillimin, prodhimin, tregtimin dhe shitjen e makinave të pasagjerëve, automjeteve të lehta tregtare, kamionëve, autobusëve, shasive për autobusë dhe motorët me naftë, biçikleta motorike, duke përfshirë edhe prodhimin e pjesëve rezervë dhe pajisjeve shtesë. Grupi Volkswagen gjithashtu angazhohet dhe në shpërndarjen e automjeteve.

Grupi Volkswagen operon në Shqipëri përmes 2 filialeve të mëposhtme:

Porsche Leasing SHPK është një shoqëri me përgjegjësi të kufizuar, e themeluar sipas legjislacionit shqiptar dhe me objekt aktiviteti: veprimtari e qirasë financiare, agjent në sigurime.

Porsche Albania SHPK është një shoqëri me përgjegjësi të kufizuar, e themeluar sipas legjislacionit shqiptar dhe me objekt aktiviteti: shitje me shumicë dhe pakicë të automjeteve të të gjitha llojeve, pjesëve dhe aksesorëve të tyre, kryerje e riparimeve të të gjitha llojeve të automjeteve, përfshirë montimin e automjeteve të përfunduara, modifikim i automjeteve dhe prodhim i pjesëve dhe aksesorëve, etj.

Pala Shitëse: Hexad GmbH është një shoqëri me përgjegjësi të kufizuar, e themeluar sipas ligjeve të Gjermanisë, me objekt aktiviteti: zhvillimi dhe tregtimi i softuerëve dhe produkteve të tjera në sektorin e IT, ofrimi i shërbimit të mirëmbajtjes, trajnimeve, zhvillimi i projekteve dhe konsulencë.

Administratori i kësaj shoqërie është z. Suresh Shamanna.

Shoqëria Target: Njësia e Biznesit “Mobility Servis Platform zhvillon softuer të personalizuar në fushën e shërbimeve të lëvizshmërisë (p.sh. u mundëson përdoruesve të planifikojnë, rezervojnë dhe paguajnë për lloje të shumta të shërbimeve të lëvizshmërisë). Zhvillimi i softuerit bëhet sipas specifikimeve dhe kërkesave specifike të CARIAD SE. Softueri i zhvilluar më pas është në pronësi të CARIAD SE. Prandaj biznesi target nuk zotëron asnjë të drejtë IP pas zhvillimit të softuerit, por paguhet vetëm për ofrimin e shërbimit të zhvillimit.

II. Përqendrimi

Ndërmjet shoqërisë Hexad GmbH (shitësi), shoqërisë CARIAD SE (blerësi) dhe personit fizik Suresh Shamanna (themeluesi) është lidhur Kontratë Blerje për Njësinë e Biznesit “Mobility Service Platform”, më datë 27 janar 2023.

Bazuar në termat dhe kushtet e përcaktuara në këtë marrëveshje, shitësi synon të shesë Njësinë e Biznesit “Mobility Service Platform” (MSP) (në veçanti duke përfshirë të gjithë punonjësit, marrëdhëniet kontraktuale, rezultatet e punës dhe të drejtat e përdorimit, njohuritë dhe asetet e tjera

thelbësore, që do t'i caktohen njësisë së biznesit në përputhje me këtë kontratë, por pa asetet dhe kontratat e përjashtuara nga kontrata) si njësi e veçantë biznesi e pavarur, organizative, një njësi biznesi e aftë për funksionim.

Bazuar në Udhëzimin “Mbi kontrollin e përqendrimeve ndërmjet ndërmarrjeve”, pika 1.3 “Objekti i Kontrollit”, parashikohet se: “Objekt i kontrollit mund të jenë një ose më shumë, ose gjithashtu pjesë të ndërmarrjeve të cilat përbëjnë njësinë ligjore, ose aseteve të kësaj njësie ose vetëm një pjesë e këtyre aseteve. Përftimi i kontrollit mbi asetet mund të konsiderohet si një përqendrim, vetëm nëse këto asete përbëjnë ndërmarrjen si një e tërë ose një pjesë të saj d.m.th. një biznes me një përfaqësim në treg, e cila ka një xhiro vjetore tregu. Një transaksion në lidhje me asetet e paprekshme të tilla si markat, patentat ose të drejtën e autorit mund të konsiderohet si një përqendrim nëse këto asete përbëjnë një biznes me një xhiro vjetore. Në çdo rast, transfertat e licencave të markës, patentave dhe të drejtave të autorit, pa asete të tjera shtesë, mundet vetëm të plotësojnë këto kriteret, nëse licencat janë ekskluzive në të paktën një territor të caktuar dhe transfertat e këtyre licencave do të transferojnë aktivitetin që gjeneron xhiroja”.

Nga vlerësimi i marrëveshjes konstatohet se Mobility Service Platform përbën një njësi biznesi me përfaqësim në treg, e cila krijon xhiro dhe në përfundim të transaksionit, kjo njësi do të zotërohet plotësisht nga CARIAD SE.

Referuar dokumentacionit të depozituar, transaksioni i propozuar përbën një përqendrim në kuptim të nenit 10 dhe 12 të ligjit nr. 9121 datë 28.07.2003 “Për mbrojtjen e konkurrencës”, i cili është objekt autorizimi nga Komisioni i Konkurrencës.

III. Vlerësimi i konkurrencës

Në zbatim të nenit 3, pika 7, të ligjit nr. 9121, datë 28.07.2003 “Për mbrojtjen e konkurrencës”, si edhe Udhëzimit nr.76, datë 07.04.2008 “Për përcaktimin e tregut përkatës”, treg përkatës do të konsiderohet tregu i ofrimit të shërbimeve IT për programim/zhvillim softueri të bërë me porosi (softuer individual), por duke qenë se transaksioni nuk do të ketë ndikim në tregun shqiptar, tregu përkatës i produktit do të lihet i hapur. Treg përkatës gjeografik do të konsiderohet territori i Republikës së Shqipërisë.

Transaksioni i propozuar konsiston në përfitim të kontrollit të Njësisë së Biznesit “Mobility Service Platform” nga shoqëria CARIAD SE. Njësia e Biznesit MSP zhvillon softuer të personalizuar në fushën e shërbimeve të lëvizshmërisë, operon si një njësi ekonomike dhe realizon një xhiro vjetore.

Shoqëria CARIAD SE është një filial në pronësi të plotë të Volkswagen Aktiengesellschaft (Volkswagen AG), ndërmarrja mëmë e Grupit Volkswagen, grup i cili operon në Shqipëri përmes shoqërive të zotëruar indirekt prej tij: Porsche Albania SHPK dhe Porsche Leasing SHPK, në tregun e shitjes së automjeteve dhe në tregun e qerasë financiare e sigurime.

Përqendrimi nuk do të krijojë mbivendosje ose marrëdhënie të rrjedhës së sipërme apo të poshtme midis aktiviteteve të palëve në nivel kombëtar dhe për këto arsye, transaksioni i synuar nuk do të sjellë ndryshim dhe nuk do të ketë ndikim në tregun shqiptar.

PËR KËTO ARSYE:

Komisioni i Konkurrencës, në bazë të nenit 24, shkronja d dhe nenit 56 pika 1 të ligjit nr. 9121, datë 28.07.2003 “Për mbrojtjen e konkurrencës”,


VENDOSI:

1. Të autorizojë përqendrimin e realizuar nëpërmjet përfimit të kontrollit të Njesisë së Biznesit “Mobility Service Platform” nga shoqëria CARIAD SE.
2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.

Ky vendim hyn në fuqi menjëherë.


KOMISIONI I KONKURRENCËS

Leida MATJA




Zv/Kryetar

Rezana KONOMI



Anëtar

Adriana BERBERI



Anëtar

Denar BIBA



Kryetar



SHOIPËRISË SË
REPUBLIKËS
AUTORITETI I KONKURRENCËS